



Broj:
Goražde, 01.04.2026. godine

Na osnovu člana 50. stava (3). Zakona o zdravstvenom osiguranju („Službene novine Federacije BiH", broj: 30/97, 07/02, 70/08, 48/11, 36/18 i 61/22) i člana 19. Statuta Zavoda zdravstvenog osiguranja Bosansko-podrinjskog kantona Goražde („Službene novine BPK-a Goražde", broj: 6/16"), Upravni odbor Kantonalnog zavoda zdravstvenog osiguranja Goražde, na svojoj 21 (dvadesetprvoj) redovnoj sjednici održanoj dana 01.04.2026.godine, donosi:

PRAVILNIK

o uslovima, načinu korištenja i visini naknade troškova prijevoza sanitetskim vozilom

DIO PRVI - OSNOVNE ODREDBE

Član 1 . **(Predmet)**

(1) Ovim Pravilnikom utvrđuju se uslovi, način korištenja i visina naknade troškova prijevoza sanitetskim vozilom osiguranih osoba Zavoda zdravstvenog osiguranja Bosansko-podrinjskog kantona Goražde (u daljnjem tekstu: Zavod).

(2) Sanitetski prijevoz, u smislu ovog Pravilnika, podrazumijeva prijevoz osigurane osobe u ili iz zdravstvene ustanove radi pružanja zdravstvene zaštite, vozilom posebno opremljenim za prijevoz pacijenata uz prisustvo medicinskog osoblja.

(3) Prijevoz vozilom hitne medicinske pomoći ne smatra se prijevozom u smislu odredbi ovog Pravilnika.

DIO DRUGI - PRAVO NA SANITETSKI PRIJEVOZ

Član 2. **(Pravo na sanitetski prijevoz)**

(1) Pravo na sanitetski prijevoz ima isključivo osigurana osoba koja:

a) je onkološki pacijent u terminalnoj fazi bolesti i čije zdravstveno stanje zahtijeva transport uz stalni medicinski nadzor, ili

b) je onkološki pacijent koji je nepokretan i čije zdravstveno stanje zahtijeva transport uz stalni medicinski nadzor.

(2) Sanitetski prijevoz se odobrava samo u slučajevima kada se osigurana osoba ne može transportovati drugim prijevoznim sredstvom bez ozbiljnog ugrožavanja života ili zdravlja.

(3) Ostale kategorije osiguranih lica ne ostvaruju pravo na sanitetski prijevoz na teret sredstava Zavoda.

Član 3.
(Medicinska opravdanost)

(1) Postojanje uslova iz člana 2. ovog Pravilnika utvrđuje nadležni doktor medicine na osnovu medicinske dokumentacije.

(2) Terminalna faza bolesti i nepokretnost moraju biti jasno potvrđeni nalazom doktora specijaliste određene grane medicine.

DIO TREĆI - POSTUPAK OSTVARIVANJA PRAVA NA SANITETSKI PRIJEVOZ

Član 4.
(Prijedlog za sanitetski prijevoz)

(1) Prijedlog za odobrenje odgovarajućeg sanitetskog prijevoza, utvrđuje doktor medicine ugovorene zdravstvene ustanove u Bosansko-podrinjskom kantonu Goražde (u daljnjem tekstu: doktor medicine).

(2) Prijedlog za upućivanje na liječenje u drugu zdravstvenu ustanovu mora sadržavati:

1. odluke komisije Zavoda za upućivanje osiguranih osoba na liječenje van kantona,
2. dokaz o onkološkom oboljenju (saglasnosti komisije za davanje saglasnosti za liječenje osiguranih osoba Zavoda na teret sredstava Federalnog fonda solidarnosti, izuzev troškova prijevoza usluga dijalize),
3. potvrdu o terminalnoj fazi bolesti ili nepokretnosti (nalaz doktora specijaliste određene grane medicine),
4. odluke za sanitetski prijevoz.

(3) Prijedlog se dostavlja nadležnoj komisiji Zavoda.

(4) Zdravstvena ustanova u koju je osigurana osoba upućena na liječenje van BPK-a Goražde, prijedlog za odobrenje sanitetskog prijevoza, pri povratku iz zdravstvene ustanove, dostavlja direktno Zavodu.

(5) Ukoliko zdravstvena ustanova primarne zdravstvene zaštite iz stava (2) ovog člana prijedlog za odobrenje sanitetskog prijevoza dostavi direktno ugovorenoj zdravstvenoj ustanovi na području BPK-a Goražde, ista je u obavezi u roku 24 sata proslijediti predmetni prijedlog nadležnoj komisiji Zavoda na rješavanje.

Član 5.
(Odobravanje sanitetskog prijevoza)

(1) Na osnovu dostavljenog prijedloga, odnosno mišljenja o potrebi prijevoza, nadležna komisija odobrava prijevoz izdavanjem „Odluke o odobravanju sanitetskog prijevoza,,.

Za osiguranike-onkološke pacijente Odluka za sanitetski prijevoz važi za cijeli period liječenja počev od datuma izdavanja saglasnosti Federalnog fonda zavoda zdravstvenog osiguranja i reosiguranja FBiH pa do završetka liječenja.

(2) Odluka se donosi isključivo ukoliko su ispunjeni uslovi iz člana 2. ovog Pravilnika.

(3) Ukoliko nadležna komisija Zavoda nije odobrila osiguranoj osobi pravo na sanitetski prijevoz, izdaje se Odluka sa dodatnim obrazloženjem.

(4) Osigurana osoba Zavoda koja je nezadovoljna odlukom nadležne komisije Zavoda ima pravo uložiti žalbu na Odluku iz člana 5. stava (3) ovog pravilnika, u skladu s poukom o pravnom lijeku.

(5) U Drugostepenom postupku nadležna Komisija za prava osiguranika i kontrolu lijekova donosi preporuku i mišljenje Upravnom odboru.

Član 6. **(Nadležnost za sanitetski prijevoz)**

Sanitetski prijevoz, u pravilu, osigurava ugovorna zdravstvena ustanova primarne zdravstvene zaštite prema mjestu prebivališta osigurane osobe.

DIO ČETVRTI – NAKNADA TROŠKOVA

Član 7. **(Visina naknade sanitetskog prijevoza)**

(1) Zdravstvenoj ustanovi primarne zdravstvene zaštite na području Bosansko-podrinjskog kantona Goražde koja izvrši sanitetski prijevoz priznaju se troškovi prijevoza.

(2) Visina naknade utvrđuje se:

- u visini 15% od cijene jedne litre goriva po pređenom kilometru, i
- dnevnicu vozača u iznosu od 45,00 KM.

Član 8. **(Propisana dokumentacija)**

Ugovorena zdravstvena ustanova primarne zdravstvene zaštite, nakon obavljenog sanitetskog prijevoza, dužna je dostaviti sljedeću dokumentaciju:

1. fakturu,
2. putni nalog zdravstvene ustanove,
3. saglasnosti komisije za davanje saglasnosti za liječenje osiguranih osoba Zavoda na teret sredstava Federalnog fonda solidarnosti,
4. odluku o odobrenju sanitetskog prijevoza,
5. odluku komisije za liječenje van kantona
6. i medicinsku dokumentaciju (nalaz).

Član 9. **(Ograničenje prava)**

(1) Zavod ne snosi troškove sanitetskog prijevoza ukoliko nisu ispunjeni uslovi iz ovog Pravilnika.

(2) U tom slučaju troškove snosi osigurana osoba.

Član 10. **(Isključenje putnih troškova)**

Korištenjem sanitetskog prijevoza osigurana osoba i pratitelj osigurane osobe nema pravo na naknadu putnih troškova.

DIO PETI – ZAVRŠNE ODREDBE

Član 11. (Prestanak važenja)

Danom stupanja na snagu ovog Pravilnika prestaje da važi prethodni Pravilnik o uslovima, načinu korištenja i visini naknade troškova prijevoza sanitetskim vozilom broj: 08-04-4-441/25 od 04.03.2025. godine i Pravilnik o izmjeni pravilnika o uslovima, načinu korištenja i visini naknade troškova prijevoza sanitetskim vozilom broj: 08-04-4-441-1/25 od 03.02.2026. godine , kao i svi raniji akti koji regulišu ovu oblast.

Član 12. (Sastavni dio Pravilnika)

Sastavni dio ovog Pravilnika čini obrazac (PRS-1).

Član 13. (Stupanje na snagu)

Ovaj Pravilnik stupa na snagu danom donošenja, primjenjuje se od 01.04.2026. godine i objavit će se na web stranici Zavoda.

Dostavljeno:

- rukovodiocima sektora
- zdravstvenim ustanovama sa područja BPK-a
- a/a

**PREDSJEDNIK
UPRAVNOG ODBORA**

Enver Ratković